



Las partenarias Martina Stadler ed Yvonne Schuler da la destinaziun turistica e'l partenari Gerhard Hauser fan impringias cun aua minerala da Scuol.

fotografia: Flurin Andry

## «Sustegn da la Pro Aua Minerala»

**Cun differentas masüras s'haja rendü a Scuol plü visibla l'aua minerala chi sbuorfla in quista regiun. Quista lavur as cuntinuescha cun ulteriurs progets.**

Il plü grond s-chazi da la regiun turistica Engiadina Scuol es la vainchina da funtanas d'aua minerala chi sbuorflan qua. Per render attent plü ferm a quista sporta, ch'otras regiuns nun han, d'eira gnü lantschà avant duos ons il proget turistic da reposiziunar l'aua forta. Il turissem regional culla directura Martina Stadler e la manadra dal proget Yvonne Schuler ha realisà plüssas masüras, per exaimpel tablas, l'aua minerala i'l clucher dal Bogn Engiadina Scuol, la marca «miraculaua» per render attent ad arrandschamaints in connex cun aua forta e pösts cun infuormaziuns sper ils bügls a Scuol ingio chi cula aua minerala our dals chüerns. I'l prossem futur vegnan realisats ulteriurs progets chi rendan plü visibel il s-chazi «aua minerala». La Fundaziun Pro Aua Minerala (PAM) es eir da la partida pro quists progets. Quella vain presidiada da Gerhard Hauser.

**FMR: Gerhard Hauser, chi fa part da la fundaziun Pro Aua Minerala?**

Gerhard Hauser: Vicepresident es Philipp Gunzinger, president sun eu, il capo cumünal Christian Fanzun rapreschainta il cumün, Martina Stadler il turissem regiunal, commember es eir il meidi Christian Casanova chi'd es ün bun cugnuschidur da las auas mineralas e lur effets pel corp uman.

**Che rolla giova la fundaziun PAM pro'l proget da reposiziunar l'aua forta?**

Our da quel intent sun nats duos progets parzials, la Senda da l'aua minerala e l'inscenaziun da las funtanas. Per quists progets han dumandà las respunsablas dal turissem scha la PAM dvantess la portadra da quels. Siond cha l'intent da render plü visibla l'aua minerala e sia valur es precis quai cha nossa fundaziun vουλ, eschna stats subit d'accord da far quai.

**Co han Els scumparti las incumbenzas?**

Respunsabla per l'inscenaziun es Martina Stadler e pella senda d'aua minerala Yvonne Schuler. Nus vain fundà üna pitschna gruppa. Da quella fan part el las duos, lura l'agentura Bellprat e partenaris, da vart dal cumün Niculin Meyer e da la PAM sun eu da la partida. Uschea vaina chattà ün'organisaziun pac cumplichada chi po reagir svel.

**Co as preschainta la situaziun dals in-chaschamaints da l'aua forta?**

Tant las funtanas sco eir ils in-chaschamaints sun proprietà dal cumün. Vi da quels es il cumün landervia. Il böt es da tils mantgnair e scha pussibel eir render accessibels.

**Es l'idea da sendas d'aua minerala nouva?**

Na, üna senda d'aua minerala existiva fingià. Ella cumanzaiva pro la funtana da suolper sü vers Plavna e finiva sü Stron a Sent. Cur ch'eu n'ha surtul il presidi da la fundaziun suna chaminà üna jada sün quist traiget da la senda. Quai nu d'eira realistic da vulair far tuot in üna jada. Perquai s'haja stübgia co chi's pudess far cun ün traiget plü cuort chi's rivess istess pro las funtanas principalas. Uschea s'haja s-chaffi las trais sendas: La cuorta, adattada per familias, cumainza a Scuol staziun e maina pro las funtanas Vi, Clozza, Sotsass e tras cumün pro'ls bügls chi mainan eir aua forta. Lura saja eir la senda plütöst istorica, oura Nairs. Là füssa l'idea cha'ls giasts pudessan far üna visita a la Büvetta. Sco terza esa amo la senda ün pa plü lunga, da Nairs fin sü San Jon. Partenza sarà a Scuol pro l'infuormaziun turistica. Qua as survgnaraja eir tuot las infuormaziuns necessarias.

Intervista: fmr/fa